



## **Kerajaan Perpaduan terus perkasa martabat syiar Islam, pembangunan umat**

Bernama

Jun 23, 2023 04:00 MYT

KUALA LUMPUR: Usaha memartabatkan syiar Islam dan pembangunan umatnya terus diperkasakan di bawah Kerajaan Perpaduan menerusi pelbagai agenda yang dirangka selaras Perlembagaan Persekutuan.

Pensyarah Kanan Pusat Kajian Usuluddin dan Falsafah, Fakulti Pengajian Islam, Universiti Kebangsaan Malaysia, Yusri Mohamad Ramli berkata, ia dibuktikan dengan kerjasama rapat Raja-Raja Melayu dan kerajaan dalam memelihara kepentingan umat Islam menerusi Majlis Kebangsaan Bagi Hal Ehwal Agama Islam Malaysia (MKI).

Beliau berkata, MKI yang dipengerusikan Sultan Selangor, Sultan Sharafuddin Idris Shah dan mendapat pengawasan langsung oleh Majlis Raja-Raja, serta timbalan pengerusi merupakan Perdana Menteri, Datuk Seri Anwar Ibrahim, dilihat sebagai sebuah badan syura berwibawa dan berperlembagaan.

"Perkara ini menggambarkan kerjasama rapat Raja-Raja Melayu dan Kerajaan Perpaduan yang menjadi jantung rakyat dalam memelihara kepentingan umat Islam dan mengelak Islam daripada terus dipolitikkan mahupun diancam oleh mana-mana pihak.

"Kerjasama erat raja dan kerajaan ini merupakan perlambangan bahawa tingginya kedudukan Islam di negara ini sekali gus memberi keabsahan agama Islam sebagai agama rasmi seperti termaktub dalam Perlembagaan," katanya kepada Bernama.